

Èkwo-ozì K'èto, Jìṅnu Deru

¹ Èkwo-ozì ọwa-a shì l'èka m̀be onye e meru ọgerenya Chìochì. Onye mu ede iya anụ bụ Gayọsu onye mu yeru obu opfu lẹ mu l'iya t̀kowaru bya amaru ọkpobe-opfu ono. ² Sụ-a; ọnyà mu, dù mu l'obu; mu epfujekwa anụ Chileke g'o mekwaa g'iphemiphe, jehuru ngu; ẹhu adụ ngu ike; mbụ gẹ mu maanuru-a l'obu ngu bẹ ẹhu d̀kwapho guu. ³ Ọ d̀uru ụnwunna, harụ bya akọoru mu l'ì pfu-shikwaduru-a ike l'ọkpobe-opfu ono; lẹ ndzụ ngu l'ophu b̀kotaepho ndzụ ire-lanụ. Ẹhu tsoo mu ntumatu. ⁴ Ọ tọ dudu iphe, akajèbaa mu eme g'ẹhu tsoo mu uto; 'abudu lẹ mu n̄maru lẹ ndzụ ụnwegirima mu b̀kotaepho ndzụ ire-lanụ.

Aaja Gayọsu ajaja

⁵ Ọnyà mu, dù mu l'obu; iigoshijekwa l'ọ gbaru g'e gude ire ngu ẹka l'iphe, iimekpọoru ụnwunna anyi; mb̀kpoo mẹ ụnwunna, byaru abyabya. ⁶ Ẹphe kọru Chìochì-a k'eye obu nkengu. Jìko yejekwaru phẹ ẹka m'ẹphe -gbeshi jeshia ije phẹ. Mbụ-a; mejekpọeru phẹ phọ iphe, jiru Chileke ẹpho. ⁷ L'eshinu ẹphe gbeshikpọoru ije l'iswi ẹhu Kéreshi-a bẹ ta adukwa iphe, ẹphe ekweje anata l'èka ndu abudu ndu kẹ Kéreshi. ⁸ Noo ya bụ lẹ ndu d̀ ẹgube ono bẹ ọ gbaru kẹ g'anyi

yejeru ẹka; g'oo-buru iya bu l'anyi l'ephe tukoru gbaru mgba l'eje ozi k'okpobe-opfu ono.

Dayotirifisu waa Dimitiriyosu

⁹ Mu deru nwẹkwo-ozì nù Chìochi; ophu Dayotirifisu, onye woru onwiya dobe l'ishi eyeduru mu onu. ¹⁰ Oo ya bu lẹ: mu -bya; bẹ mu ewofuta iphe, oomegbabẹ, bu iya bu mkpokoro opfu, anọduje afushi iya l'onu, oogudeje adzushi ụka ekpu anyi. Teme ophu ono ejikwaru iya pho ephe. O gbeshi ozo; o jika g'unwunna ta abya g'ephe lẹ ndu Chìochi kwee; bya akposhikwaapho ndu o du g'ephe l'ephe kwee g'ephe te eme nno; bya ebufu phẹ lẹ Chìochi.

¹¹ Ònyà mu, du mu l'obu; ta anwukwa ẹka ejo-iphe; nwuchikwa ẹka iphe, du ree. O kwa o-me-ree bu kẹ Chileke; o-me-njọ teke ahuma-swekwaa Chileke.

¹² Dimitiriyosu bẹ onyemonye tu-dzuru onu eme oma nkiya; teme okpobe-opfu ono l'onwiya nọdu ajakwa iya pho ajaja; mbedua l'onwomu nọdu ajakwa iya pho. Unu maru l'ajaja, anyi aja iya bu eviya.

Ekele mkpochi-ishi

¹³ Mu nwekwaru ikpoto iphe, mu gege ederu ngu; ole o to budu mkpara-ekwo yee mini-ekwo bẹ mu e-gude degbuaru ngu g'o du mu. ¹⁴ Mu ari lẹ mu ta anọedu odu; mu akpapfuta ngu; anyi lẹ ngu abowaroya l'iphu l'iphu.

¹⁵ G'ehu dukwa ngu guu.

Ònyà ngu phẹ l'ekelekwaa ngu roya-o. Kelekwarupho anyi ònyà anyi phẹ l'ehu l'ehu.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d